

1. UVOD

Za temu mog specijalističkog rada opredijelio sam se iz razloga što se na našim prostorima, odnosno u našim fudbalskim klubovima, u praksi veoma rijetko može primijetiti planiran i programiran rad sa mlađim kategorijama.

Mislim da je stvaranje mladog fudbalera jedan dugotrajan, mukotrpan proces, koji mora biti stručno i precizno isplaniran i isprogramiran. Jedan od najzahtjevnijih, a u isto vrijeme i najljepših zadataka trenera, je da od djeteta zainteresovanog za fudbal, stvori mladog fudbalera. Stvoriti zdravu ličnost bez strahova i predrasuda, sposobnu brzom rasuđivanju, je veliki izazov za svakog trenera i pedagoga. Ulazak u fudbalski svijet je u početku igra, koja postepenim odrastanjem i ulaskom u profesionalni svijet, postaje daleko ozbiljnija i prelazi u ozbiljan posao i rad.

Osnovni faktori za uspješnost i pravilnu edukaciju budućih vrhunskih fudbalera su: selekcija, tehnika, taktika i fizička priprema.

Osnova od koje se polazi da bi se došlo do vrhunskog fudbalera je **selekcija**. Ona nije u njenom samom početku konačna, već traje kroz čitavu obuku i sazrijevanje fudbalera, ali je ona temelj stvaranja budućeg vrhunskog fudbalera.

Tehnika kao važan faktor koji se povlači kroz školovanje fudbalera, bazirana je na neograničenom broju ponavljanja i usvajanju različitih tehničkih elemenata, kako pri statičkim, tako i u situacionim uslovima.

Taktički elementi edukacije malih šampiona trebalo bi da počnu od prvog dana, navikavajući djecu na prostor i postepeno stvaranje osjećaja za igru.

Fizička priprema postepenim doziranjem daje poseban značaj u drugom dijelu školovanja budućih fudbalskih zvijezda.

Imajući u vidu sve ono što bavljenje fudbalskim sportom pruža mladima, mogu reći da je sport veoma značajan i to iz više razloga:

- Da obezbijedi zadovoljenje biološke potrebe za kretanjem i igrom, ostvarujući istovremeno i pozitivan uticaj na svestrani tjelesni razvoj i razvoj funkcionalnih sposobnosti;
- Da doprinosi stalnom poboljšanju fizičkih sposobnosti, razvijanjem snage, brzine, koordinacije, gipkosti i izdržljivosti koji su neophodni za svakodnevni život i rad;

- Da doprinosi formiranju fizički i psihički zdrave ličnosti;
- Da obezbeđuje uspješno uključivanje u društveni život;
- Da kod mladih razvija neophodne osobine od značaja za uspjeh u sportu, a i drugim oblastima života;
- Da se kod mladih razvija drugarstvo, prijateljstvo i kolektivizam;
- Da mlade fizički i psihički pripremi za posebne sportske napore;

Bavljenje sportom je predmet interesovanja velikog broja ljudi, posebno mladih koji se opredjeljuju iz raznovrsnih razloga za određene sportske discipline.

Fudbal je fenomen koji više od jednog vijeka privlači pažnju miliona ljudi, u stanju je da na jednom mjestu okupi više od stotinu hiljada ljudi, a broji više od stotinu miliona poklonika.

Savremeni način fudbalske igre zahtijeva veliku sposobnost i spremnost (snaga, izdržljivost, brzina), kao i visok nivo tehničke i taktičke obučenosti. Da bi se stvorio uslov da se sve to postigne, mora se posvetiti velika pažnja radu sa mlađim kategorijama.